

4
DISSERTATIO MEDICA
INAUGURALIS,

DE

Frigore quatenus Morborum Causa:

QUAM,

ANNUENTE SUMMO NUMINE,

Ex Auctoritate Reverendi admodum Viri

D. GULIELMI WISHART, S. T. D.

ACADEMIAE EDINBURGENAE PRAEFECTI;

NEC NON

Amplissimi SENATUS ACADEMICI Consensu,
et Nobilissimæ Facultatis MEDICAE Decreto;

*Ut summos in Medicina Honores ac Privilegia rite et
legitime consequatur,*

Eruditorum Examini subjicit

GULIELMUS MAGHIE *Scoto-Britannus.*

Ad xviii. Calendas Septembris, H. L. Q. S.

EDINBURGI:

In Ædibus R. FLAMINII, M.DCC.XLVI.

DISSERTATIO MEDICA

DE

Frigore quatenus morborum causa.

EST inter omnes artes scientiasque humanas, eas præfertim quæ ad naturæ cognitionem pertinent, quasi foedus quoddam et conjugium, quo lucem sibi invicem, vim et dignitatem mutuo præbent. Inter eas vero talem sortita est medicina locum, ut ex ea, tanquam ex centro quodam communi, acies mentis nostræ in cæteras omnes dirigatur. Adeo ut sæpenumero mecum animo putarem, divinam sapientiam corpus hocce fragilissimum, ejusque morbos nobis, vel etiam dono, dedisse; ut nimirum doloribus illis ad naturam perlustrandam excitaremur: Quo nihil excogitari potest utilius, vel ad divinam percipiendam bonitatem et sapientiam, vel ad mentes nostras juxta naturæ regulas, et summæ pulchritudinis speciem fingendas. Nunquam igitur sine voluptate summa obvenit menti, quod animum tandem medicinæ adhibuerim, quodque in ea potissimum terrarum plaga versatus fuerim, ubi, maximo cum fructu et puritate, istiusmodi disciplinæ traduntur.

Non satis est igitur, si quis medicinam callere velit, ut corporis humani tantummodo fabricam contempleretur: ex variis enim et innumeris fere rebus externis pendet sanitas nostra, variisque per totam naturam scrutandis remediis, si laesa sit, recuperanda. Cum vero omnium rerum externarum in corporis oeconomiam effectus pernoscendi sint medico,

A

tum

tum Caloris et Frigoris præcipue, quibus nulli magis varii et generalis sunt usus.

Et si vero Calor et Frigus, cum ad nostra corpora referantur, nihil absolutum, sed relativum quoddam tantummodo denotent; attamen, si illum ponemus corporis statum quo ne vel minimum dolorem ex acre quiescente percipiat, Caloris et Frigoris terminum quasi et finem tenemus. Cætera sensus sunt distinguere.

De Frigore dicendum: et, quoniam varii ejus, secundum vires, effectus, intensiōis gradus quam diligentissime notandi sunt. Temperatum igitur vocabo quodcunque sanguinis circuitum non interpellat.

Præcipuæ Caloris et Frigoris virtutēs sunt, quod corpora omnia rariora ille, hoc densiora reddat.

Quodcunque autem corpus sit densius, partes ejus magis in contactum attractione mutua nituntur, adeoque magis vi dissolventi resistunt; solidiora exinde duriora et firmiora fiunt: hoc modo roborat corpora animalia Frigus.

Omnes corporis nostri fibræ musculares, saltem dum vita fruimur, Contractiles sunt et Elasticæ. Contractile est corpus, quod partes suas ita intra mutuæ attractionis sphaeram dispositas habet, ut, nisi vi quadam aliena distraherentur, propius ad se invicem accederent. Elasticum dicitur, cujus partes ita vi externæ cedunt, ut intra mutuæ tamen attractionis sphaeram mancant, seque subito, vi externa remota, in pristinum vindicent situm. Qui affectus omnium corporis animalis actionum quasi principium et fons est.

Ex attractione igitur pendent hi fibrarum affectus. At, quo propiora sibi invicem corpuscula sunt, eo majori vi in mutuum contactum nituntur; Frigus ergo, quod densius reddit omne corpus, vim illam contractilem et elasticam intendat necesse est. Hinc difficilius in Frigore sanguinis impetui cedunt vasa, citius sese restitunt: major exinde cordi resistentia, major cordis, quippe quod pro resistentia vires suas intendit, nisus: ex quibus oritur pulsus fortior, rarior, et æquabilior.

Corpora

Corpora omnia mota in eadem lineâ rectâ, qua primum propulsa sunt, nisi vis aliqua nova intercedat, progrediuntur. Itaque, quo propius canalis quicunque ad lineam rectam accedit, eo magis fluida per illum projecta liberum et imminutum servant impetum; vas enim laxum facile in anfractus flectitur sinusque distenditur, unde sanguinis vis frequenter in latera ejus impingit et retardatur: quapropter Frigus, utpote quod in lineam rectam contendat vasa, liberiores sanguini cursum hac quoque ratione præbet.

Eadem de causa, spiritus animales, animi rerumque externarum internuncii, promptius magisque alacres, ad quasunque corporis partes, per expeditos tensione nervos advolant, officiis suis funguntur, et validiorem animo imprimunt sensum. Quod callent nimium qui miserorum artus supra rotam extenso ad contractionem Frigida affusa sollicitant.

An ex doloris sensu, qui spiritus ad locum affectum derivat, iisque vasa minima distendit, oritur fibrarum aliqua ex parte contractio?

At præter naturalem hanc curtationem, fit quoque a voluntate, in movendis scilicet membris, musculorum contractio: quæ contractio, cum, quocunque demum fiat modo, spiritus pro instrumentis habere videatur, facilius et fortius in Frigore temperato, tensis nimirum jam fibris vividisque magis spiritibus, quam si flacceſcant langueantque ex calore, perficietur.

Sanguis quoque, et ipso Frigore, et vasorum constrictione compactus, melioris erit et firmioris crasseos: omnesque functiones ejus naturales, utrum ex motu intestino, vel solidorum actione, vel particularum attractione, vel conglutinatione quadam pendcant, circuitus, secretiones, nutritio, excretiones perfectius erunt absolutæ.

Debilitat ergo calor, corroborat frigus, corporis soliditatem sanguinisque crasin compingendo, vim contractilem et elasticam vasorum intendendo, fluidorum circuitum expediendo, nervorum actionem augendo, usquedum vim sanguinem spiritusque propellentem non exsuperet fibrarum rigor.

Hoc

Hoc firmat experientia. Si quis enim in aere moderate calido, tepido præsertim, quiescat; intumescunt venæ, rubet facies, hebescent sensus, celeriter non tamen fortiter pulsant arteriæ; languidus, enervis, debilis fit; caput gravedine, lassitudine membra corripuntur. Ut vero torporem excutiat; suspirat, oscitat, pandiculatur, artus extendit, stridentem pleno pectore vocem exprimit. Frustra tamen; redit torpor, diffluunt spiritus, flaccescunt musculi, procidit caput, decidunt manus, solvuntur genua, lenis denique sensibus obrepit somnus. Quæ omnia ex resolutis fibris et rariori sanguinis compage explicari possunt.

At si idem in temperatum transeat frigus, omnia fiunt contraria: detument carnes, recedunt venæ, palescit vultus; tardus, fortis, rarus, æqualis devenit pulsus; alacer, fortis, impiger ad negotia capeßenda advolat homo.

Hi sunt frigoris, quod temperatum jamdudum appellavimus, salutare plerumque effectus. Nunc alios vero, qui ex intensiori frigoris gradu, ab eadem tamen origine, constrictione scilicet et densatione deducendæ, proveniunt, insequamur. Horret igitur, tremit, micturit, acrem satis dolorem sentit, in globum se contrahit, quicumque frigori nudus exponitur: tenuis ex oculis naribusque stillat humor; incurvantur digiti, et inhabiles fiunt ad motum vel sensum; rubent manus, natus, aures, et quæcunque alia corporis pars latam satis aeri superficiem exhibet.

Quæ doloris in frigore causa? An quia particulæ sanguinis, in constrictis vasibus magis coarctatæ, frictione nervos vellicent? An quia, sustentaculis musculorum vique eorum contractili in diversum trahentibus, rupturam minitentur fibræ? An quia pungentes, nescio quas, excipiant carnes, ab aere frigido, particulas?

Unde tremor? An est quasi vibratio musculorum ex oscillante æquilibrio inter constrictionem vasorum et distendentem fluidorum impulsus? An ex motu fluidorum inæquali per vasa nimia constrictione hic illic obstructa?

Profluit

Profluit vero jugiter ex oculis naribusque humor tenuis, quem emunctoria illa constricta, per poros suos, jam angustissimos redditos, exprimunt.

Si nudas manus ex magno frigore ad ignem subito admoveamus, immanissimo cruciantur dolore. An causa est, quod sanguis, ut natura est fluidorum, citius rareseat quam Solida; ideoque, inter subitam sanguinis distensionem et validam vasculorum contractionem, compressi nervi angantur? An quod sanguis, mole sua et vi per reliquum corpus auctis, in vasa illa contracta adhucdum arietet?

Si quis vero inter nives geluque diu nimium degat, manuum ejus pedumque primum digiti, cæteræ dein corporis partes, ab extremis illis cor versus, motu sensuque privantur; rubræ, fuscæ, lividæ, nigræ denique fiunt; et in gangrænam, sphacelum ac mortem exinde degenerant. Tum enim validissima fit vasorum constrictio, in iis præsertim membris quæ majorem frigori superficiem exponunt, quæque longè a corde remota minorem circuitus vim, minorem attritum, minorem ergo calorem internum sentiunt; adeo ut aboleantur omnino cavitas eorum, humorumque per eos circuitus.

Unde tamen evenit quod membra ista, nisi putrescant jam plane, ex nivis appositu refocillantur? Estne quod spicula nescio quæ in carnes gelu impactæ, ut perhibent quidam, ab homogeneis in nive spiculis attrahantur? An potius quod vasa constricta ad naturalem tonum gradatim, non subito, sint revocanda? Sanguinis enim impulsus, subito nimis calore auctus, partes illas, frigore jam induratas, separaret forte a vivis, adeoque mortuas redderet, citius quam circuitum iis restituere posset.

Si in aquam frigidissimam aliquis subito immergatur; exprimitur primum ab externis, et ad internas corporis partes introPELLITUR sanguis. Mox tamen ab aucta solidorum vi, majori spirituum animalium niû, fortiori exinde nervorum actione, et validiore cordis impulsu agitato, in vasa sua cuneatim pangitur et cumulatur; et in minora forte, quam ei excipiendo prius fuerunt, truditur; unde ruberrima fit cutis, et acris valde cruciat dolor. An compressum quoque serum rubri sanguinis

iterum speciem induit? Statim vero emergenti gratus per totum corpus diffundit sese calor, ex aucta nimirum frictione proveniens.

At si abundet nimium sanguis, vel debiliora alicubi sint vasa, quam ut sanguinis in ipsa subito ruentis impetum sustinere valeant, rumpuntur; citamque mortem, vel liberum sanguinis extra corpus profluvium, vel suppurationem variosque suppurationis exitus, prout in diversis corporis partibus evenit ruptura, inducunt: unde, quam plethoricis inimica sit subita in frigidam immersio, licet monstrare.

Si obstinato vero nimis animo perstet homo alioquin sanissimus; augescit frigus, augescit valorum, donec impermeabilia plane fiant, constrictio; deficient cordis, nervorum, et spirituum, cum summum frustra adhibuerint nisum, vires; stagnat sanguinis omniumque humorum circuitus; quiescunt motus, sensus, cæteræque functiones animales; linoquit denique corpus, ut sibi non ulterius obtemperaturum, anima.

At, si neque sanguinis redundantia nec vasorum imbecillitas inhibeat, vix credi potest quam salutare sint frigida immersiois effectus. Crebris enim illis subitisque conquassationibus excutiunt quodcunque laxum, heterogeneum vel noxium, sibi adhærescit, fibræ; et in arctius compactæ spatium fortior attractionis vim, atque cohæsionem exinde minus postea solubilem, acquirunt; humores per vasa semiclausa vel leviter obstructa propellunt; supervacaneam ex cellulis suis pinguitudinem exprimunt; sanguinis crasin, movendo, miscendo, compingendo, meliorem reddunt. Unde patet, qua ratione corporis compagem roboret; cutim ad omnes tempestates induret; Rachitidem, et quicumque morbi ex fibra debili pendet, sæpissime; Dolores Rheumaticos, aliosque qui ab obstructione oriuntur morbos, aliquando, curet.

Huc usque de frigoris in corpus universum effectibus, ubi minus est, nisi ab nimia forte intensioe, periculi, differuimus.

At si, dum reliquum corpus calidum, laxum et molle sit, pars quædam frigore constringatur, tunc plus subest discriminis. Humorum enim particulæ, quæ laxos vasculorum fines liberè satis permeant, ad contractas illas partes sistuntur; circuitu

circuitus impetu cuneatim adiguntur; mutua attractione, dum nullo divelluntur motu, coalescunt; vascula ad fortio-rem adhuc contractionem stimulant; cordis omnisque systematis arteriosi vires, quæ obstaculum perfringere annituntur, intendunt. Hinc celerius, fortius et durius pulsant arteriæ; humorum putrescentia, solidorum attritus, amborum calor per totum corpus augetur. Aucta vero circuitus vis plus sanguinis ad loca obstructa defert, accumulatur et impingit; quod vasa in tumorem distendit, ruborem ex sanguinis copia, pulsationem ex vasorum renixu, et dolorem ex distensione fibrarum, inducit; suppurationem denique, ex vasorum ruptura et humorum effusione, vel gangrænam forte, a suppresso penitus vitali motu, minatur.

Hi tumores vero, sicut cæteræ inflammationes, aut resolvendi sunt aut suppurandi. Resolvuntur autem, laxando vasa, elasticitatem eis restituendo, sanguinis impetum cohibendo vel alio derivando, calorem reprimendo, humorum crassitatem diluendo, et tenacitatem dissolvendo. Ad quos fines præcipua remedia sunt sanguinis missio, alvi subductio, vesicantium applicatio et diluentium potus.

Venæsectione minuitur sanguinis copia et impetus; restituitur inde distensarum nimis fibrarum elastica vis, qua obstruentem facilius expellere possint materiem; laxatur reliqui systematis vasculosi constrictio, quo facilius materiam istam in se recipiant: tenuiores, utpote minus compressi, ideoque fluidi magis fiunt humores; et derivatur, ex parte, ab usitato circuitus cursu versus pertusæ venæ orificium eorum impetus: solvuntur spiracula cutis, quo facilius quodcunque noxium est ex humoribus diffilari et elui possit: quod crassum, lentum, renax antea fuerat factum, nunc cum reliqua sanguinis mole mixtum, tritum et comminutum, in eandem redactum est indolem. Eadem fere præstat purgatio; spiritus forte exhaurit sanguinisque crasin fundit magis, unde debilior fit utrorumque actio. Vesicantia vero ex cantharidibus conflata penetrant, incidunt, dividunt, dissipant, et extrorsum alliciunt obstruentem materiem; vasibusque stimulum subdant ut fortius eam excutiant. De diluentibus non est ut quicquam ulterius dicam.

At

At non eadem semper est morborum ex frigoris constrictione facies. Cum enim varii sint vasculorum ordines; minimi illi, qui arteriarum et venarum quasi termini sunt, obstrui quoque possunt: unde dolores, lassitudines, horrores et febres varii generis, sine ulla inflammationis, ruboris, aut tumoris externi nota, proveniunt. Vel si inæqualiter frigore perflatur corpus, et retardetur inde sanguinis cursus donec corrumpatur, et crassa illa, lenta et tenax materies progignatur, quæ, in nullo certo loco deposita, per corpus circuitus vi rapitur; leves inde obstructions hic illic oriri possunt: quæ, quoniam circuitus impetu perfringi possint, ab alio in alium locum vagantur. At innumeri fere sunt præterea constrictionis effectus qui animo possunt concipi.

Sanguis vero, in his obstructionibus, ex venis, pleno saltu, eductus et frigesceus pellem quasi, albam, duram, crassam, et rigidam instar corii fere porcini, fursum ejicit. Ejus enim particulæ mora a tenuioribus feri particulis separatae, et crebris forte offensionibus complanatae, pluribusque idcirco punctis se invicem tangentibus, fortius exinde mutuae attractionis illecebris implicantur.

Hæc sunt quæ de simplicioribus vasorum constrictionis et fluidorum densationis, sine alio cujusvis rei interventu, effectibus tradenda pro tempore habui. Restant vero quamplurima excutienda, quæ vel ex impedita perspiratione, vel ex aeris frigidi malignitate proveniunt. Et, quantumvis minus exploratis fortasse rationibus nitantur quæ dicenda, quam quæ dicta sunt, multa tamen verisimillima, atque morborum Phænomenis et curæ congruentia, ex nota corporis fabrica, perspirationis et aeris natura, analogia, et experimentis, possunt erui.

Inter omnes corporis humani excretiones præcipuum fere locum obtinet, utrum copiam ejus, vel ad salutem necessitatem spectes, perspiratio cuticularis: reliquas certe omnes æquat quantitate, usu et momento præcellit. Cum alia enim excrementa remanere possint in corpore sine aliqua noxa, oportet ut hoc, simulac conficiatur, extra corpus eliminaretur.

Cumque

Cumque illa, quasi ingestorum fordes, terrestribus magis, gravibus, et pigris constent partibus; hoc, ut spiritus fere, agile magis et actuosum, humorumque fermentatione, si ita appellare liceat spontaneam eorum mutationem, ad igneam quandam subtilitatem evectum, veneni fere naturam induit. Quantos igitur tumultus ciere possit hæc materies, intra corpus decemta, facile est judicatu: et sane impeditus ejus exitus, vel a dotibus suis propriis recessus, primum est ut plurimum labescens sanitatis et ingruentis morbi indicium; vel sæpe, ut fas est suspicari, causa.

Quapropter, providus rerum opifex alias paratas esse voluit vias, per quas hoc virus, si quando occluderetur cutis, exiret. Si nondum enim ad idoneam satis tenuitatem elaboratum sit, per canales urinarios, vel per intestina, cum fecibus mistum, elabitur. Sin vero subtili jam et penetrante præditum fuerit indole, totum corpus pervadit, superficiem internam humectat, cavitatibus per vasa exhalantia sese insinuat, et per varia emunctoria aufugit.

Nimia sua copia, acrimonia, vel crassitie, nocere potest hæc materia; ex quibus varii morborum scaturiunt fontes.

Si nimia hujus liquidi copia in vasibus detineatur; gravitatis sensum, lassitudinem, torporem, et dolores gravedinosos excitat. Si vero in internas corporis partes subito irruat; vasa exhalantia dilatat, tonum eorum labefactat, viscera proluit, mucum abradit, et omnia debilitat: unde Catarrhi, Diarrhœæ, et Hydropes varii generis, originem trahunt; quibus sua cuque est medendi methodus.

Acre vero se, vel in optima valetudine, prodit perspirabile hoc cuticulare: gustu scilicet; si quando linguæ apex cutim, non statim lavatam, quamvis mundissimam tangat: et tactu; cum recens vulnus vel teneram oculi membranam Chirurgi manus vexet. Acrius vero sola retentione et mora fieri, ex spontanea omnium fere humorum putrescentia, admodum videtur probabile.

Si frigus ita constringat vasa etiam profundiora, ut perspirationis materiam, jam acrem factam, quasi claustris includant, nec

liberum ei transitum præbeant ; primum, quasi gravitas totius corporis, lassitudo artuum, spirituum languor, debilitas musculorum, hebetudo sensuum, gravedo capitis, et lumborum dolor sentitur ; mox horror, tremor, sensus frigoris, et resolutio quodammodo nervorum, invadit ; deinde Calor omnia perterritat et solvit : quem si excipiat profusus, per totum corpus æqualiter prorumpens, nec externo frigore cohibitus sudor, cum symptomatum remissione, diffilatur morbi fomes, et æger sanus evadit. Laxat enim simul et distendit occlusa illa materies vasa, labefactat exinde, et levibus hic illic obstructionibus officit ; hinc inæqualis fit ille spirituum fluxus, qui tremulum motum inducit musculis. Cor vero gravatum, cum onus excutere conatur, sanguinis motum accelerat ; unde major frictio, quæ caloris est proxima causa. Simul ac autem spiracula cutis calore humido laxentur, et humor superfluus, aucta circuitus vi, expellatur, solutus est morbus. Stragulis ergo cooperiendus est æger ; ut molescat nimirum cutis, et aperiantur pori : calidis, tenuibus, paululum spirituosius liquidis, quæ calorem et circuitum multum intendere non possint, diluendi sunt humores ; ut eliciatur scilicet, non expellatur, sudor.

Sin nullus intensum calorem excipiat sudor, omnia in pejus ruunt. Strictior et aridior fit cutis, vasaque angustiora ; sævit sanguis, et in impeditos ruit locos ; ubi, magna vi adactus, difficiliore obstructiones in minimis vasibus gignit ; donec febris tandem emicet.

Motu omni violento, et nimio æstu perspirabile hoc in sudorem vertitur ; id est, in humorem tam varii, secundum corporis conditiones, ingenii, ut proprias ejus dotes indicare quam difficillimum esset, acrem tamen plerumque, falsum et olidum. Nam ita comparata est natura cutis, ut per eam plerumque noxia sanguinis inquinamenta eluantur : quapropter acutorum omnium crises hac via sæpissime fiunt. Et sane nimie exercitationis et æstus effectus est levis febris : acceleratur enim sanguinis cursus ; unde maturius in putrescentiam et acrimoniam proclives ruunt omnes humores, varia-

que

que ea de causa per corpus noxas darent, nisi pinguitudine obvolutæ, et tenui hac materia dilutæ, acriores extra corpus particulæ statim ejicerentur. Ideoque maximum est periculum, si quando excretiones illæ, cum ad summam evectæ fuerint acrimoniam et malignitatem, intra corpus, subita frigoris constrictione, coercerentur: irritant enim et dilacerant, quocunque transeunt, vasa, et tormina visceribus cient.

Si vero in pulmones, quorum compages laxior et irritabilis magis est, depluant, ad crebrum conatum, quod grave illis sit, per tussim ejiciendi sollicitant: qua concussione uberiores sibi humorum affluxum alliciunt. Et humores illi, dum tenues manent, quamvis continuam fere tussim excitant, vim tamen pulmonum expultricem eludunt, et aridæ, ut vocatur, tussis constrictione pectoris dant speciem. In hac morbi periodo, humorum affluxus cohibendus, et nervorum irritatio sedanda est; quod egregie præstant opiata, si nulla sit obstructionis, ex signis supra memoratis, suspicio. At vero, si acris nimis jam sit materies, et, continua pulmonum agitatione, nova humorum vis in pectora derivetur; tunc incrassantibus acrimonia retundenda, quibus tenuis ille humor impeditus, expultrici pulmonum facultatiprehendendus traditur. In hoc quoque egregiam navat operam Laudanum; mora enim et requie, quam præbet, inspissantur sponte humores, liquidiori nempe parte difflata et absorpta. Sin autem infarctantur jam viscida materiâ pulmones; ne vasa comprimerentur nimis, venæsectione cumprimis est cavendum: materia dein attenuantibus, solventibus et incidentibus dissolvenda, vel purgantibus per alvum subducenda: pulmones, quo facilius elabi patiantur hanc materiam, lubricantibus obducendi sunt, et balsamicis ab acrium tritu muniendi. Epispasticis quoque inciduntur aliquando, vel alio derivantur, cum exitu secundo, humores. Nec sulphureis etiam, ad siccandum et corroborandum, suus haud infimus deest locus.

Craustum vero, lentum, et viscidum mora deveniri hunc liquorem, nemo, opinor, qui aliorum, omnium forte, humorum naturam, vasculorum fabricam, et cutis phænomena satis animadvertit,

nimadvertit, revocabit in dubium. Unde rationem tenemus quare impeditam perspirationem, præsertim si sordibus corpus sæpe obductum sit, et edulia ingurgitentur dura et glutinosa, insequatur scabies, aliique morbi cuticulares, qui, pruritum excitando, acrem suam indolem satis produnt.

Hos enim morbos a variolis, morbillis, cæterisque exanthematibus, quæ criticæ ex sanguine secretionem esse videntur, discrepare, satis ex diversa medendi methodo constat.

Quæ raucitatis causa? estne musculorum tracheæ arteriæ rigor, an muci qui teneram faucium membranam muniendo est penuria; glandibus scilicet minorem quantitatem, ob constrictionem vel infarctionem, secernentibus?

An Catarrhi, non a generali per totam corporis superficiem, sed proprio istius loci, ubi incidunt, perspirationis impedimento, proveniunt? Tegumentis etenim, quæ glandulas hujus lymphæ secretioni inservientes superne obvolvunt, frigore magis constrictis, et liberum humorum accessum renuentibus, plus defertur ad glandulas sanguinis, plulque idcirco conficitur ab iis feri. Quamvis autem ingeniola satis, nec leviter rejicienda sit hæc Hypothesis; attamen, utrum vero sit congruens, hæret adhuc animus. Si quis enim pulmonum morbis, quantumvis leviter, obnoxius in frigidum procumbat lectum, tussi illico exagitatur; annon ex acris cujusdam materiæ accessu oritur hæc titillatio? et undenam venit illa materies? nam eodem aere eodemque frigoris gradu perflantur adhuc pulmones. Quid totam, quantum scire possumus, internam corporis superficiem humectat? unde micturit, unde sitim levatam, et alvum, strictum prius, liquidiores sentit qui frigori nudus exponitur? At si ex universa fibrarum constrictione per consensum, quod experimentis quibusdam verisimiliter redditur, oriuntur; annon glandulæ illæ, æque ac cuticula superextensa, constringerentur? Et constrictione sane acute, ubi maxima est, versus interiora corporis, ubi minima, humores exprimat necesse est.

At sine noxa totam perspirationis materiam intra corpus, per unius spatium noctis, detentam fuisse in medicina sua statica

statica docet Keilius: unde objectionem huic hypothese struit; quæ inexpugnabilis forte esset, nisi alios Natura exitus huic liquori parâset, quibus, etiam in athletica valetudine, magna ejus pars effluit.

Nec pluris est, quod non tam frigoris in aere, quatenus thermometro saltem indicatur, quam humiditatis ratione grassentur morbi, qui frigori vulgo vitio vertuntur. Varios enim frigoris vel caloris gradus, pro densitate sua, suscipiunt corpora; unde aqua in frigore frigidior multo, in calore calidior, est aere. Vapores igitur aquosi aeri humido affatim innatantes, et corporibus nostris continuo applicati, majorem nobis excitant algoris sensum, et notabiles magis edunt frigoris effectus.

At prætereunda nequaquam est doctorum quorundam opinio, qui non impeditæ perspirationi, sed aeris frigidi malignitati cuidam morbos istos, qui Frigoris esse censentur, adscribunt. Quæ opinio si ullis innititur argumentis, ex aeris natura, corporis oeconomia, et similibus quibusdam phænomenis ea petenda sunt.

Cum in omnibus fluidis liberius multo moveant, promptiusque impulsibus quibuscumque cedant particulæ, crebræ inde, ex diversa earum gravitate, attractione, elasticitate, infusione, cæterisque agendi modis, subeunt mutationes. Est autem aer corpus varium admodum et heterogeneum, multisque refertum undique abreptis particulis; adeo ut nullum forte in rerum natura sit fluidum, quod tam multis, diversis, mobilibus, et inter se pugnantibus constet principiis; præterea quod tanta ei vis elastica repellens et attrahens infit, ut peculiaris ferè ei et propria esse censeatur: hinc summa mobilitas. Quapropter, nec absurdum esset omnino processum quendam, chymicum si velis, ex mutua nimirum particularum in se invicem actione, qualis in vegetantium animaliumque humoribus cernitur, in aere quoque suspicari. Hoc certe commune habet cum illis, quod, si quietum sine motu, in calida præsertim temperie, maneat, cito corrumpatur; quodque ventorum agitatio, alterna caloris et frigoris

D

ris mutatio, et continuus novi aeris accessus, quasi circulatio quædam, ad sanitatem ejus et vitam quodammodo necessaria sint.

Intestinis igitur hisce motibus, Atmosphæram novas variæ virtutis substantias progignere, verosimile potest videri. Quo fit quod aër tam diversæ sit indolis, secundum varios temperiei suæ status quod ad calorem, densitatem, humiditatem, aliasque reconditas magis qualitates, quas vel ex vicinis terræ locis, vel ex intestino suo motu suscipit. Et quidni frigus quoque indolem ejus mutare credamus; præsertim cum tam proprios et singulares edat effectus? Nam frigus, quod tantas aliis corporibus inducit mutationes, ut in gelu videmus, nullam in ipsa aeris regione mutationem inferre, non æquum est censere. Cumque multa in aere calido formentur quæ oculorum aciei subjecta sunt, ut aurora borealis, tonitru, et exhalationes; plura vero quæ forma sua sub sensibus non cadunt, sed effectibus tantum, lethalibus sæpe, nimium notescunt; quid eandem vim frigori negemus? Quid suas ei pestes, et sua venena tribuere recusemus?

Si corporis vero fabricam spectemus; eam noxas hæc excipiendo quam aptissimam esse confitendum. Nam præter liberum aeris in pulmones, respirando, et intestina, cibos sumendo, introitum; innumeris, per totam superficiem hiantibus vasculis, corpus nostrum avidè, quæ per aera fluitant haurit. Maxime vero hoc fit, cum patulum ubique et bibulum redditur calore corpus; vel cum laboribus, sudoris profluvio, et spirituum dispendio, inane et laxum devenit. Quod summonere nos potest, qua ratione delassatas et exhaustas vires renovare possimus; locis scilicet, non aridis omnino et exsuccis, sed humoribus ad hanc rem facientibus humectatis, cautè, ita ut Frigoris absit periculum, componendo corpus. Nam huc referri debet, quod ii, qui supra herbas quasdam, cum dormitum eunt, lassæ et exinaniti sese projiciunt, vegeti, alacres, et succo pleni assurgant.

Quomodo vero effectus suos hæc frigoris progenies in corpore edat, non nostrum est demonstrare. Argumenta tantum, quæ

quæ verisimilem hanc hypothesin aliquatenus reddere possint, in animo est ob oculos ponere. Quo facit, quod intestinis fluidorum mutationibus, modo fere chymico, si ita licet loqui, crebro suboriri videantur morbi acuti. Quæ mutationes sæpe rei alicujus extraneæ, quamvis minutissimæ, accessu, mirum in modum, ut flammâ incendium, excitantur: quod satis superque venenis et contagione probatur. Quodque sine contagione in mutationem indolis suæ, vel novæ cujusdam substantiæ generationem, tendant humores, ex continua animalium putrescentia, et morborum veneno ac crisibus patet. Virulenta quidem ista coagulationem, acrimoniam, vel spicula quædam humoribus; et mutationes illæ humorum obstructionem vasibus, quæ proxima acutorum causa censetur, possunt inferre.

Utrum vero malignum quoddam ex Frigore virus naturam incessat, tantolque cieat in corpore tumultus, linquendum adhuc sub judice censemus. At quicumque aeris imperium, in omnia vegetantium et animalium corpora, perpendit, non temere prorsus rejiciendum, credo, putabit. Estne enim aeri facultas quædam, qua flammam, vitam, et vegetationem sustentat; qua facultate deficiente, evanescit quasi rerum anima? Annon variis anni tempestatibus, varii pullulant flores et fructus, quod ex notis aeris virtutibus nequaquam videtur oriri? Annon interpellit quasi fermentationem, et vina vapida reddit tonitru? Et, ut ad Medicinam redeamus, annon discrepant morborum ingenia, secundum diversas annorum constitutiones, modo æque inexplicabili? Annon epidemice grassantur, et sine nota aliqua causa invadunt sæpe numero, hi ipsi frigoris morbi? Quæ omnia monstrare possunt, quam curta sit in rerum virtutibus evolvendis nostra scientia; et quam modestos nos, in præfiniendis morborum causis, præbere debeamus.

F I N I S.

